

嵯縣志

余銘宋題



嵎縣志卷十五

人物志

文苑

明

張胃字仲翼少聰敏年十二能爲雪賦既長從天台顧景藩遊肆力於古文詞嘗聘修輿圖志新昌楊給事信民以經學該博才堪任使薦不報遂絕意仕進徜徉溪山間自號西溪子著有西溪集卒年八十餘以子世軒貴封奉政大夫

乾隆李
志下同

錢悌字舜夫居長樂鄉性耿介博覽經史善屬文詩尤沉鬱蘊藉著有古齋詩文集邑令許岳英聘修縣志悌叔汝貫弟經樵俱善吟咏而經樵尤有古行爲鄉邦推重

夏雷字時震居西隅弘治己酉舉人性和易有才工詩善真草書

輯縣志搜訪山川人物纖悉靡遺知湖廣羅田縣甫十月卒於官嘉靖間郡守張明道隆慶間邑簿江一鳳爲立石表墓

錢善祥字應楨敦孝友邃於尙書兼通歷數嘗與朋舊遊林壤間

唱詠爲樂自號敬齋著有敬齋吟稿若干卷

同治志

沈三復字甫甸居德政鄉性明敏未及冠博通今古值明季遂隱不應試清定鼎或勸圖進取不應晚年課子孫以德行爲先著訓子十諭功過錄日新銘皆有裨於世教康熙乙亥卒年七十

新纂

清

李茂先字文驥居邑東歲貢生少孤母陳氏植節督教之著聲藝

林山陰王白岳雨謙奇其才爲序漁溪集而名益著

乾隆李志

商元柏字令素洵美子康熙壬午舉人擅詩名在西園十子之列

官諸城令遷泰安州同知以長子盤貴累贈中憲大夫著有刻
藤詩鈔元柏次子書字響意諸生著有畫圖山房詩鈔

同治志
下同

張基臺號詠菴自幼聰穎授以經書輒了了稍長博涉過目不忘
成童舉縣試第一雋於庠次年歲試卽以第一食餼乾隆己酉
受知朱文正珪登拔萃科是年舉於鄉寶侍郎光鼎時爲座師
見其文歎曰此浙中名宿何久屈也嘉慶辛酉銓補金郡教職
爲上官所器重基臺假館南北授徒甚衆每課期必自搆二藝
爲程式至老不倦著有詠菴稿詠菴雜著應制詞賦別集等書
未梓

吳之璫號月巖歲貢生稟姿卓犖博覽羣書尤熟精文選南華昌
黎諸書極受知於寶學使光鼎詩歌學韓杜書法宗歐陽一時
碑版每出其手授徒林立多成名者

錢錦山字蓮峯優文行少通經史能書善古文尤工制藝嘉慶癸酉以選拔入成均是秋捷鄉闈文名藉甚歷年掌教邑中登高第者多出其門生平好獎借後進有片長譽之不置口或不踴卽面折之不稍假道光間邑令李式圃屬纂縣志工竣遊楚南初王孝廉景章未遇時錦山與同學交最摯時令零陵有政聲頗以振興文教爲己任郵書招主講席既至都人士素耳其名問字者尤衆適教匪趙金隴陷藍山王以能吏參幕府軍事旁午錦山與有勞焉寇平王欲上其功固辭旋里復主講剡山者數年家居爲人排解無虛日每以一言消釁邑人賴之

宋仁華字梅莊居一都愛湖旁幼穎異善屬文性尤嗜學足不下樓者數載嘉慶癸酉舉於鄉己卯成進士需次家居授徒鄉里所造就者多成名士入都後尙書麟魁中丞麟桂俱受業焉道

光癸巳選授廣東英德令檄署思平縣事以寬惠稱二年餘卸篆旋卒於省垣二麟既貴顯修師弟誼尤摯蓋不忘所自也著有碧筠書屋詩文稿若干卷

魏懋昭字德園白泥墘人與敦廉爲昆季行同學同遊庠同領鄉薦敦廉穎悟而懋昭沉靜以此名相埒癸未敦廉捷南宮懋昭下第汪文端招之曰生今科復不中耶亟索場作觀之擊節稱賞已而知以三場小疵見乙乙之者卽文端也大呼負負由是懋昭之名噪都下己丑大挑二等以教職用歷署昌化縣訓導義烏縣教諭後任寧波府訓導主講月湖書院門下多知名士旋丁內艱不復出後敦廉數年卒

呂鏞字曉樓早知名學使阮文達元試紹屬古學得鏞卷大奇之拔爲監屬冠又以第一入嵎庠既而阮膺命撫浙召鏞辭不赴

鋪博通經籍尤精於易工詩古文詞歿後遺稿多佚僅存數種
曰香稻山莊賸詩叶南偶鈔摘豔薰香三墳訂譌

郭鳳樞字章華剡西人恩貢生幼聰穎日誦千言年十四卽補博士弟子員詩文以工麗勝屢爲學使所激賞二娶氏柴亦能詩
閨門唱和灑如也

王景程字璞齋啓豐子也幼穎悟試輒冠軍道光壬午領鄉薦戊子預修邑志生平善行楷書畫亦擅長尤工於詩近元和風格
己丑禮闈報罷南旋歿於吳江舟次年三十二士林惜之著有
滋蘭詩草

周松齡字青峯父愛堂邑諸生有優行松齡幼穎異善屬辭道光
間由選貢中副車乙未復舉於鄉文譽暴甚時中丞烏爾恭額
耳其名喜賀主司曰今浙闈得三名士蓋謂武林吳敬義甌東

王玉與松齡也試禮部罷歸以母年邁不復出里居授徒經指授者多得意去嘗修邑志葺城垣暨籌餉賑饑諸大事咸脫身任之辛酉冬洪楊軍竄入奉母避居母卒松齡以哀憤成疾越數月亦卒

吳鵬飛字孚軒棠溪人拔貢生性端方明大義博學能文兼工詩尤善書法道光初充武英殿校錄補太平教諭士習丕振未幾卒於任

施燮字乃雍居禮義鄉性至孝父母年邁意或不合燮每長跪作孺子泣不得親歡不起由廩貢歷署烏程龍遊昌化雲和景寧於潛學教諭善畫蘭工詩著有南榮詩稿長子彰字葭帆諸生亦善畫著有畫家易知錄越中名勝詩

呂燮煌字西邨長樂鄉人性穎悟九齡時侍師夜坐師曰汝能卽

景成詩乎燮煌口占月上山頭靜風來水面涼之句師大奇之
比長以詩古文雄於時有至性事親以孝聞於人無少長煦煦
親愛未嘗立崖岸義所當爲又強力自任邑中公舉恆待決於
燮煌數十年間凡修城籌餉諸役多賴以集事家故貧而周人
之急常若不及以道光乙未舉於鄉五上春官不第旋任臨安
教諭甚得士心方倡葺文廟未卒事以疾歿於署士林悲之著
有師竹山房詩文集四卷鹿門山水志數卷藏於家

邢佳畹字愚菴居太平鄉歲貢生性樸誠力學長於古文爲學使
汪瑟菴所器重經史子集靡不研究尤精詩學著有詩訓求故
十卷

錢登化字春坡長樂人道光丁酉拔貢入都閱歷山川風土及與
諸名宿往來辨論所見益廣自負所學必能表見及南闈屢躋

遂棄舉業肆力於漢宋諸儒之學遇異說必參酌而求其是下
至諸子百家星緯輿圖仙釋方技亦必探討源流會修邑志校
訛刊謬登化之力居多焉著有春秋彙纂集說二十四卷春秋
列國輿圖四卷列國世系圖四卷列國年表四卷兩漢撫華四
卷韻籟八卷剡中山水人物考四卷剡俗方言四卷憫斯集二
卷春坡草堂文集十二卷春坡日記十六卷藏家卒年七十一

新纂

下同

錢壩字蘇門長樂人咸豐丙辰歲貢生工詩古文辭鄉里貞節婦
女寒微者徵訪彙旌出橐金爲樹石通衢嘗集同志刻周海門
證學錄著有穀貽堂詩文各一卷行世子義瑞字質庵諸生能
畫梅光緒丁丑冬大雪彌月賣畫煮粥以拯饑餓

錢鎔字可山長樂鎮人郡廩生天才敏捷頃刻可千言其爲詩古

文辭踔厲風發一掃浮靡頗嗜酒酒酣縱論古今人物臧否原委畢貫衆以人物志目之喜經濟之學不屑爲時藝惟文獻之有關於郡邑鄉族者務悉心攬摭爲掌故資著有嵎志贗言二卷所見集十二卷草蟲吟一卷志中多採之其餘著述尙富俱

藏於家

同治志
下同

錢燿字月樵邑廩生古竹溪人淹貫經史古今文援筆立就尤究心於經世之學垂老不倦著有邊防志三省海防志等書未梓子四長登選字曉山積學知名振奇自喜以太學生應鄉試兩備薦被遺會軍興遂練習武術善用刀咸豐辛酉洪楊軍自暨東潰竄入邑境倉卒被虜或以其技聞於酋釋縛令試之握大刀百斤舞生風十餘人環而潑水不得入方相顧睥睨時突乘間揮斫衝壘出衆皆披靡遂脫歸挈諸弟率鄉團反攻之復轉

戰會稽諸暨間有聲邑故產茶不善製輒鈍賈晚歲創設製茶
廠於平水鎮舶運通海外邑中茶利之大源登選開之次子智
字水心倜儻有大志精天文旁研奇門遁甲之術六應舉不售
泊焉以詩酒自娛著有水心詩集未梓幼子登達自有傳見鄉賢
魏蘭汀字夢香湖頭人性聰穎善讀工詩年十五爲諸生屢試高
等食餼年二十九卒士林惜之嘗游學於越中能詩者祀於
詩巢蘭汀與焉著有夢香草若干卷行世

任湘字純香石舍人洪楊軍入嵎湘領團勇數千衛桑梓亂定襄
辦善後局又同建忠義祠修城隍廟越明年主講剡山同治庚
午修邑志任領局卒年八十三著有拜石軒稿新纂下同

裘曼星字洧倩崇仁人諸生能文尤長於詩卒年三十六著有寄

廬詩稿四卷

陳錫金字錦甫陳村人廩貢生族有遺腹孤母嫁不能存活錫金育之成立宣統三年舉孝廉方正著有惜陰軒遺稿末梓

孫瑞文字雪舫安富鄉人歲貢生善爲古文辭宗桐城姚氏治經史亦有門徑嘗曰不讀小學則羣經不可得而讀也不讀春秋左氏傳則二十四史不可得而讀也卒年五十有五著有抱膝吟廬詩文集十二卷續集一卷行世

屠鵬字嶠雲號古鳳禹溪人廩生長於鄒氏之學以爲讀書宜先識字不治小學不得爲識字也善書自篆隸至漢魏六朝金石皆能窮其奧云

錢鍾嶽字申甫長樂人爲古文廉悍逼人同時孫瑞文善古文於儕輩少所許可獨推服鍾嶽謂不懈而及於古著有墨妙樓詩文稿若干卷

張壽嶽字東生寶溪人廩貢生時清季制科未廢俗儒沉溺章句之學壽嶽卽棄帖括好讀西籍務求有用南鄉學風爲之一變善古文辭學廬陵遺貌取神晚年每一文出人爭傳誦焉著有蟄廬詩文集藏於家

李懷庚字星曹居邑城風儀俊雅工詩精篆隸八分癖嗜古金石蓄漢碑數十名人篆刻圖章二百餘方日必陳几上摩挲數四性和易與人無忤雖橫逆勿校某甲素卵異於懷庚已而以怨報反造廬謝之某甲媿服居鄉好施與無德色年二十三遊學杭州以無疾卒於講舍士林惜之著有杭滬雜詠未梓王紹祥字芝生景章子邑廩生能文工詩嘗與郭醒齋錢湘秋錢質菴周石顛周警堂周漁帆呂越嶠黃儀廷邢義河邢榴青等結月樓吟社諸人皆一時著名士而推芝生爲祭酒無何里宅

爲洪楊軍所燬書籍珍玩悉付一炬亂後結茅數椽以居顏曰
半舫書屋友人過之輒與縱論古今得失人物臧否終日不竭
或語以俗事則垂然欲睡嘗集一聯懸於門云一飯未嘗留俗
客幾生修得到梅花足以知其志趣矣手訂所爲詩若干卷曰
嘉瑞堂詩存以文附焉

王恩溥字公博號海庵景章孫工詩著有海庵吟草少負大志喜
習兵家言不屑爲牖下書生洪楊軍旣起慨然思有所建樹束
裝辭家人親朋咸尼之絕裾去赴贛後不知所終

呂兆璜字小麓居白宅墅舉人傷父祖早世不獲事養乃閉門覃
思繪父祖像三旬像成見者驚爲絕肖文擅駢體初宗吳穀人
旋棄去以爲不足學肆力於漢魏六朝嘗作二懸潭記見者擬
諸徐庾著有擷紅吟榭稿

忠節

梁

張嵎鎮北將軍稷之子初爲剡令至嵎亭生子因名嵎字四山後
遂家焉少方雅有志操能清言起家秘書郎遷湘東王長史徵
爲太府卿遷吳興太守太清二年侯景圍京城遣弟伊率郡兵
赴援城陷御史中丞沈浚違難東歸嵎往見之謂曰賊臣憑陵
社稷危恥正人臣効命之秋今若收集兵力保據貴鄉雖復及
死誠亦無恨浚因勸嵎舉義時邵陵王東奔至錢唐聞之遣前
舍人陸邱公板授嵎征東將軍加秩中二千石嵎曰朝廷危迫
天子蒙塵今日何情受榮號留板而已賊行臺劉神茂攻破義
興遣使說嵎曰若早降附當還以郡相處復加爵賞嵎斬其使
仍遣軍主王雄等帥兵于鱧瀆逆擊之破神茂景聞神茂敗乃

遣其中軍侯子鑒帥精兵二萬助神茂擊嵎嵎遣軍主范智朗
 出郡西拒戰為神茂所敗乃釋戎服坐廳事賊臨之以刃終不
 為屈執以送景景刑之於都市子弟同遇害者十餘人時年六
 十二賊平世祖追贈侍中中衛將軍開府儀同三司諡忠貞
 及剡錄南史作吳人高似孫剡錄入先賢傳萬曆志嵎生於嵎後遂家焉祀鄉賢

宋

張愁一名景說字欽甫紹定四年為定城縣尉攝麻城縣事會金
 人攻破沙窩關深入麻城兵不支被執脅之降愁叱曰吾氣吞
 若曹顧力屈耳吾從汝為不義耶遂遇害事聞贈通直郎
萬曆府志

祀鄉賢

明

王禹佐字之益二台子也讀書鹿山務為實踐之學天啓元年領